

律。敕沙彌言。汝今可往。拔提河邊。取淨水來。尋往彼河。盛滿瓶水。擲虛空中。隨後飛來。時諸比丘。見是沙彌。歎未曾有。白佛言。世尊。今此須曼那沙彌。宿殖何福。生巨富家。須曼那衣。隨身俱生。出家未久。獲阿羅漢果。爾時世尊。告諸比丘。汝等善聽。吾當為汝分別解說。乃往過去九十一劫。波羅捺國。有佛出世。號毘婆尸。教化周訖。遷神涅槃。時有國王。名梵摩達多。收其舍利。造四寶塔。而供養之。時有童子。見彼塔故。心生欣樂。即便出家。年至老耄。空無所獲。深自剋責。買須曼花。持縷貫之。遍覆塔上。發願而去。緣是功德。九十一劫。不墮地獄。畜生餓鬼。天上人中。常有須曼花衣。與身俱生。受天快樂。乃至今者。遭值於我。出家得道。爾時諸比丘。聞佛所說。歡喜奉行。

八三、寶手比丘緣

佛在舍衛國祇樹給孤獨園。時彼城中。有一長者。財寶無量。選擇族望。娉以為婦。作倡伎樂。以娛樂之。其婦懷妊。足滿十月。產一男兒。端正殊妙。世所希有。其兩手中。有金錢。

出取已還有。如是展轉。取不可盡。召諸相師。占相此兒。相師睹已。此兒產時。有何瑞相。父母答言。其兩手中。有金錢出。取以還生。因為立字。名曰寶手。年漸長大。稟性賢柔。慈心孝順。好喜惠施。有從乞者。伸其兩手。有好金錢。尋以施之。將諸親友。出城觀看。漸次遊行。到祇桓中。見佛世尊。三十二相。八十種好。光明普曜。如百千日。心懷喜悅。前禮佛足。合掌請佛。及比丘僧。慈悲憐愍。愍納受我供。時彼阿難。在佛左右。問小兒言。若欲設供。當須財寶。於是小兒。聞阿難語。尋伸兩手。金錢雨落。須臾積聚。佛敕阿難。汝今取此金錢寶物。營理餽膳。請佛及僧。阿難受教。營理飲食。供養訖竟。佛為說法。心開意解。得須陀洹果。歸白父母。求索入道。父母愛念。不能違逆。將詣佛所。求索出家。佛即告言。善來比丘。鬚髮自落。法服著身。便成沙門。精勤修習。得阿羅漢果。三明六通。具八解脫。諸天世人。所見敬仰。爾時阿難。見是事已。前白佛言。今此寶手比丘。宿殖何福。生於豪族大長者家。然其兩手。有此金錢。取以還生。值佛世尊。復獲道果。爾時世尊。告阿難言。汝今諦聽。吾當為汝分別解說。此賢劫中。波羅捺國。有佛出世。號曰迦葉。教化周訖。遷神涅槃。時彼國王。名曰迦翅。收取舍

利造四寶塔。時有長者。見其豎¹椳。心生隨喜。持一金錢。安置椳下。發願而去。緣是功德。不墮惡趣。天上人中。常有金錢。伸手而出。乃至今者。遭值於我。故有金錢。取以還有。出家得道。爾時諸比丘。聞佛所說。歡喜奉行。

八四、三藏比丘緣

佛在舍衛國祇樹給孤獨園。時波斯匿王夫人懷妊。足滿十月。生一男兒。端正殊妙。世所希有。身被袈裟。生已能語。問父王言。如來世尊。今者在不在。大德迦葉。舍利弗。大目犍連。如是遍問諸大弟子。悉為在不在。父王答曰。今悉都在。唯願大王。為我設供。請佛及僧。尋敕為設。請佛入宮。見其太子。而問之曰。汝自憶念迦葉佛時。是三藏比丘。不答言實是處。此胞胎。為安隱不。蒙佛遺恩。得存性命。得過日夕。時王夫人。見此太子。與佛世尊。共相答問。喜不自勝。而白佛言。今此太子。宿殖何福。生便能語。乃能與佛。感有答問。唯願世尊。敷演解說。爾時世尊。即便為王。而說偈言。